



KEMENTERIAN PEMBANGUNAN WANITA,  
KELUARGA DAN MASYARAKAT

## SIARAN MEDIA

### PELAKSANAAN KURSUS ASUHAN PERMATA (KAP) OLEH INSTITUT SOSIAL MALAYSIA (ISM)

**KUALA LUMPUR, 5 Ogos 2020** – ISM merupakan sebuah Institut Latihan Awam yang berperanan sebagai sebuah pusat kecemerlangan dalam bidang sosial dan pembangunan sosial. ISM bukan sahaja fokus memberi latihan kepada penjawat awam terutama para pegawai dan kakitangan Jabatan Kebajikan Masyarakat (JKM), namun kumpulan sasar ISM juga terdiri daripada ahli masyarakat dan komuniti serta pengamal dan pekerja sosial.

Salah satu kursus yang ditawarkan adalah KAP yang diwajibkan ke atas pengusaha, pengurus, penyelia dan pengasuh berdasarkan Peraturan 54, Peraturan-Peraturan TASKA 2012, dan Akta Taman Asuhan Kanak-Kanak 1984 untuk memastikan kualiti asuhan dan jagaan kanak-kanak di TASKA terjamin bagi memenuhi keperluan perkembangan menyeluruh, keselamatan dan kesejahteraan kanak-kanak.

Pelaksanaan KAP di ISM telah bermula sejak tahun 2016 selaras dengan Pelan Tindakan Ibu Tunggal 2016-2020. Institut Sosial Malaysia (ISM) selaku agensi di bawah KPWKMM adalah merupakan rakan strategik JKMM yang menawarkan KAP **secara percuma** kepada golongan B40 dan Ibu Tunggal dan kemudahan ini yang membezakan ISM dengan agensi latihan KAP lain yang diiktiraf oleh JKMM. Setakat ini ISM telah melatih seramai 445 peserta yang terlibat dalam perkhidmatan TASKA. Sasaran ISM adalah untuk memastikan golongan B40 dan Ibu Waja/Tunggal yang telah mengambil upah menjaga serta mengasuh kanak-kanak mempunyai ilmu yang sebenar dalam pengasuhan dan pendidikan awal kanak-kanak di samping menjaga kebajikan keluarga dan anak-anak mereka di rumah. ISM percaya inisiatif ini akan membuka lebih banyak peluang kepada golongan B40 dan Ibu Waja/Tunggal

khususnya wanita untuk membantu menjana pendapatan bulanan serta memulakan laluan kerjaya dalam bidang pengasuhan dan pendidikan awal kanak-kanak.

Selaras dengan strategi dalam Bidang Fokus Utama (BFU) RMK11 menjadikan ISM sebagai *Center of Excellence* dalam bidang sosial dan pembangunan sosial di Malaysia, ISM berhasrat untuk memperkasakan KAP secara 'outreach', merentasi negeri dan daerah agar peluang ini turut dapat disampaikan kepada lebih ramai golongan B40 dan Ibu Waja/Tunggal.

Rancangan Malaysia Ke-11 juga menyarankan kepada pembangunan masyarakat yang lebih inklusif dengan memperkasakan masyarakat melalui pemerkasaan komuniti dan peningkatan profesionalisme dalam bidang perkhidmatan sosial. Justeru, ISM akan bekerjasama rapat dengan JKM dengan melibatkan pelbagai pihak bagi memantapkan pelaksanaan kurikulum KAP dengan mengintegrasikan modul amali dan dalam talian selain kaedah konvensional yang sedia ada. Pilihan pelaksanaan KAP dengan kaedah yang pelbagai ini adalah untuk menggalakkan lebih ramai penyertaan golongan B40 dan Ibu Tunggal mengikuti kursus ini

ISM juga dijangka dalam proses untuk membangunkan Sijil Kemahiran bagi tahap kemahiran peringkat 3 hingga 4 berkaitan Perkhidmatan Penjagaan yang melibatkan pengasuhan dan pendidikan awal kanak-kanak, penjagaan Warga Emas dan juga Orang Kurang Upaya. Sijil Kemahiran ini juga adalah antara inisiatif transformasi untuk mengangkat kualiti perkhidmatan penjagaan di negara ini.

Individu lain yang berminat tetapi tidak ditawarkan mengikuti KAP anjuran ISM, boleh memohon insentif KAP PENJANA yang disediakan oleh Kerajaan melalui laman sesawang ezi2care yang dibuka dari 25 Julai hingga 31 Ogos 2020. KPWKMM menjangkakan seramai 8900 pengasuh yang belum mempunyai kelayakan KAP boleh mendapat manfaat daripada insentif ini.

#####

Disediakan oleh : Unit Komunikasi Korporat  
Institut Sosial Malaysia  
Kementerian Pembangunan Wanita, Keluarga dan Masyarakat